

# **Peqqinnissaqarfimmi sullissinerit atuisullu akiliuteqartarnerat pillugit Namminersornerullutik Oqartussat nalunaarutaat**

Peqqinnissaqarfiup sullissineri il.il. pillugit inatsisartut peqqussutaanni nr. 15-imi, 6. november 1997-imeersumi § 2, imm. 3 naapertorlugu imm. 2, § 14, nr. 6, 7 aamma 10, aamma § 24, imm. 1 kiisalu napparsimasut inatsisitigut inissisimanerat pillugu inatsisartut peqqussutaanni nr. 6-imi, 31. maj 2001-imeersumi § 22 naapertorlugit aalajangersarneqarput:

## **Kapitali 1**

*Siunertaa, atuuffissaa, akiliinermi piumasaqaatit il.il.*

**§ 1.** Nalunaarummi matumani pineqarpoq innuttaasut peqqinnissaqarfimmi sullissinerit ilaannik atuisinnaanerak, akeqanngitsumik imaluunniit tamakkiisumik ilaannakuusumilluunniit akiliinikkut.

*Imm. 2.* Nunami maani inuit allattorsimaffianni allattorsimasunut nunamilu maani najugaqartunut imaluunniit qaammatinit arfinilinnit sivisunerusumik kipiffeqanngitsumik maani nunamiissimasunut nalunaarut atuuppoq.

*Imm. 3.* Takornariat inuillu allat tassanngaannartumik napparsimalernikkut akeqanngitsumik napparsimasutut ikiorneqarsinnaatitaaneq pillugu malittarisassanut ilaatinneqanngitsut peqqinnissaqarfimmit pisariaqartinneqartut naapertorlugit sullinneqarsinnaapput, akiligassinneqassallutillu.

**§ 2.** Nalunaarut manna naapertorlugu sullinneqarsimanermut akiligassat naatsorsorneqarneranni akiligassiinissamut peqqinnissaqarfiup makku ilanngussinnaavai:

1) uninnganermut ullormut akiliutissaq, sullissineq napparsimmavimmi uninnganertaqarsimappat imaluunniit peqqinnissaqarfiup katsorsaaviisa ilaanni unnuiffissaqartuni allatigut illusimanertaqarsimappat,

2) uninnganani katsorsartittunut uninngasunulluunniit sulisunut aningaasartuutit, uninnganermut ullormut akigititamat ilaatinneqarunnartut saniatigut sullissineq peqqinnissaqarfimmi suliaqartunit misissortinnermik, katsorsaaneramik imaluunniit paaqqutarinninnermik ilaqarsimappat,

3) nioqqutissanut/atortussanut aningaasartuutit, nakorsaatinik, nioqqutissanik/atortussanik il.il. tunniussisoqarsimappat atuisoqarsimappalluunniit, aamma

4) nassiussinermut akiliut, peqqinnissaqarfik pisarnek malinnagu tiguisussap najugaqarfianut nioqqutissamik/atortussamik nassiussisimappat, takuuk § 3, imm. 3.

*Imm. 2.* Uninnganermut ullormut akiliutissatut aki immikkoortortaqrarfiit pineqartut il.il. ullormut akigitittagassaattut Peqqissutsimut Pisortaqrarfimmit aalajangersarneqartoq.

*Imm. 3.* Uninnganani katsorsartittunut uninngasunullu sulisunut aningaasartuutit Peqqissutsimut

Pisortaqaarfimmit aalajangersarneqartut, aningaasarsianut allanullu sulisunut tunngassuteqartunut aningaasartuutitut il.il matusissutissat.

*Imm. 4.* Nioqqutissamut aningaasartuutitut nioqqutissap akia kiisalu allaffissornermut tapiliussassaq naatsorsorneqassapput. Atortussanik atuinermi nioqqutissanut akigitinneqartoq missiliugaasinnaavoq. Nakorsaatinut allaffissornermut tapiliussassaq nioqqutissap akiata 25%-eraa. Nioqqutissanut allanut allaffissornermut tapiliussassaq nioqqutissap akiata taamaallaat 15%-eraa. Tapiliussamut tassunga ilaapput nioqqutissap peqqinnissaqaarfimmut nassiunneqarneranut kiisalu peqqinnissaqaarfiup iluani napparsimmavimmut, nunaqaarfimmi nakorsiartarfimmut, nakorsaataasivimmut assigisaannulluunniit nassiunneqarneranut atasumik aningaasartuutit.

*Imm. 5.* Peqqinnissaqaarfimmit kiffartuussineq peqqinnissaqaarfiup pisiniartarfi suleqataaluunniit aqutugalugit tamakkiisumik ilaannakuusumilluunniit isumagineqarpat, peqqinnissaqaarfiup aningaasanik pisiniartarfimmut il.il. akiligassaattut annertutigisunik akiligassiisoqassaaq.

**§ 3.** Nioqqutissanut kiffartuussinernullu aningaasanngorlugit imaluunniit akiligassiineq malillugu akiliisoqassaaq.

*Imm. 2.* Nioqqutissanik akilerneqartussaataasunik pissarsiniarnerit aatsaat akiliutissat tiguneqareeraangata suliarineqartassapput, nakorsap naliliineratigut immikkut ittumik nukinginnartuunngippata.

*Imm. 3.* Allamik isumaqatigiissuteqartoqarsimanngippat nioqqutissat akilerneqartussanngorlugit nassiunneqartut najukkami peqqinnissaqaarfimmit aaneqarnissaannut piareernerarlugit nalunaaruteqarnerup kingorna piaartumik aaneqassapput. Peqqinnissaqaarfik nioqqutissamik tiguisussap najugaqarfanut apuuttussanngorlugu nassiussisussanngorsimappat angallassinermut aningaasartuutitut matusissutissanik nassiussinermut akiliutissanik akileeqquisoqassaaq, nioqqutissaq peqqinnissaqaarfiup pisiniartarfianit toqqaannartumik nassiunneqarsimanngippat.

## Kapitali 2

### *Peqqinnissaqaarfiup sulissisarfiutaani uninnganeq*

**§ 4.** Napparsimasumut ingiaqataasut qanigisaasulluunniit peqqinnissaqaarfiup akiligarinngisaaanik angalasut, napparsimasup angerlarsimaffata avataani misissortinnermi katsorsartinnermilu kiffartuussinerit pillugit nalunaarut naapertorlugu, pissutsit naapertorlugit peqqinnissaqaarfiup innersuussaani, Peqqissutsimut Pisortaqaarfiup akit aalajangersagai naapertorlugit akiliuteqarnikkut nerisaqarnissamut illusimanissamullu neqeroorfigineqarsinnaapput.

**§ 5.** Peqqissutsimut Pisortaqaarfik atornerluisut pisortanit innersuunneqartut katsorsaasarfimiinnerinut akigititassanik aalajangersaasinnaavoq, aamma peqqinnissaqaarfiup ataani pisortat sullissiviini imaluunniit pisortat sullissiviini peqqinnissaqaarfiup isumaqatigiissuteqarfigisaani imerajuttuunermut allanulluunniit pinngitsoorsinnaanngisanut katsorsaannissamik neqerooruteqartuni uninnganani katsorsartittut ilaqutaasullu najugaqarnerannut.

### *Paaqutarineqarluni uninnganerit*

**§ 6.** Inuit nakorsap naliliinera naapertorlugu napparsimmavimmi uninngatinneqartariaqanngitsut, kisiannili paaqutarineqarnissamik pisariaqartitsinertik pissutigalugu napparsimmavimmiikkusuttut, peqqinnissaqaarfimmik isumaqatigiissuteqarnikkut peqqinnissaqaarfimmi uninnganermi inissamik neqeroorfigineqarsinnaapput uninnganermut ullormut akigititaasup akilerneqartarneratigut, takuuk § 2,

imm. 1, nr. 1. Aammattaaq immikkut paaqqutarineqarnissamik pisariaqartitsisunut tapiliussamik akileeqqusisoqarsinnaavoq.

*Imm. 2.* Imm. 1 naapertorlugu nammineq piumassuseq malillugu paaqqutarineqarluni uninnganissaq pillugu isumaqatigiissut sivilunerpaamik qaammatit arfinilikkaarlugit killiligaasassaaq, peqqinnissaqarfik sapertunut paaqqutarinnittarfinni inunnut pineqartunut atugassanngorlugit aaqqissuunneqarsimasuni inissamik neqeroorsinnaanngippat. Isumaqatigiissuteqartoqassanngilaq napparsimmavik taamaaliornissamut periarfissaqanngippat.

*Imm. 3.* Taamaattoq imm. 1 naapertorlugu akiliineq atorineqassanngilaq peqqinnissaqarfik kommunalbestyrelsimik isumaqatigiissuteqarnermigut soraarninngortunut immikkut paaqqutarineqarnissaminnik pisariaqartitsisunut inissaqartitsereerpat, takuuk utoqqarnik paaqqinniffiit il.il. pillugit Inatsisartut peqqussutaat.

### *Uninnganeq sivitsugaq*

**§ 7.** Napparsimasoq uninngasoq katsorsarneqareernermit kingorna naleqquttumik inissaqartitsinnginnermik pissuteqartumik najugaqarfissaqanngikkallarpat peqqinnissaqarfik pissutsit tunngavilugit napparsimmavimmi peqqinnissaqarflluunniit paaqqinnittarfini allani uninnganerup sivitsorneqarnissaanik pineqartumut neqerooruteqarsinnaavoq uninnganermut ullormut akigititaasumik akiliisitsisarlugi, takuuk § 2, imm. 1, nr. 1. Aammattaaq immikkut paaqqutarineqarnissamik pisariaqartitsisunut tapiliussamik akileeqqusisoqarsinnaavoq.

*Imm. 2.* Naleqquttumik najugaqarfissamik pissarsinissaq allamit akisussaaffigineqarpat, soorlu kommunimit sulisitsisumilluunniit, imm. 1 naapertorlugu akiliisitsinissamik piumasaqaat tassunga toqqaannartumik saqqummiunneqarsinnaavoq.

## **Kapitali 3**

### *Iluqausersuutit*

**§ 8.** Inuit iluqausersuutini pisariaqartunik, tamatumunnga ilanngullugit timip ilaanut ajoqutilinnut amigaataasunulluunniit taarsiutaasunik, qerattaqqutaasunik imaluunniit iluarsiiissutaasunik pinnaatitaapput, takuuk peqqinnissaqarfup sullissineri pillugit Inatsisartut peqqussutaat. Iluqausersuutit taamaattut akeqanngillat, nalunaarummi matumani allanik aalajangersaasoqarsimanngippat.

*Imm. 2.* Peqqinnissaqarfik taamaallaat iluqausersuutini ikiuuttussaataavoq nakorsap naliliineratigut tamanna napparsimasumut pisariaqartinneqarpat.

### *Nakorsamit innersuussutigineqartut isikkatigut atukkat*

**§ 9.** Nakorsamit innersuussutigineqartut isikkatigut atukkat nammineq akileeqataanikkut Peqqissutsimut Pisortaqarfimmit aalajangerneqartumik akilerlugit tunniunneqarsinnaapput.

*Imm. 2.* Siullermeertumik pisaarnermi isikkatigut atugassanik aasarsiutini ataatsinik ukiersiutinillu ataatsinik tunniussisoqassaaq. Pisariaqartitsinerup allanngornerata kingunerisaanik, assersuutigalugu pilatsinnermik pissuteqartumik pisaarnerit siullermeertumik pisaarnertut isigineqassapput.

*Imm. 3.* Pisaaqqinnermi isikkatigut atugassat ukiumut amerlanerpaamik ataatsit pissarsiarineqarsinnaapput, taamaattoorlu takuuk imm. 4.

*Imm. 4.* Inuit 18-it inorlugit ukiullit ukiumut sisamariarlutik isikkatigut atukkanik tunineqarsinnaapput,

angissutsip allanngornera imaluunniit nungullaaneq pissutigalugit nakorsap naliliineratigut tamanna pisariaqartutut isigineqarpat.

*Imm. 5.* Imm. 2-4-mut malittarisassat apeqqutaatinnagit peqqinnissaqarfik isikkatigut atugassanik amerlanernik akiliisitsilluni tunniussinissaminik neqerooruteqarsinnaavoq.

*Imm. 6.* Inuit 18-it inorlugit ukiullit, utoqqalinersiutillit siusinaartummillu pensionisiallit nammineq akileeqataasartussanut ilaanngillat, tak. imm. 1.

**§ 10.** Isikkatigut atugassanik pisaaqqinnissamut taarsiullugu nakorsamit innersuussutigineqartut isikkatigut atukkat iluarsaannissaannut peqqinnissaqarfik neqerooruteqarsinnaavoq.

*Imm. 2.* Pisaaqqinermut taarsiullugu, tak. § 9, imm. 3, isikkatigut atukkat nalinginnaasut naleqqussarlugit akeqanngitsumik iluarsiviginissaat ukiumut ataasiarluni neqeroorutigineqarsinnaavoq.

#### *Iviangiusat iviangequtillu*

**§ 11.** Arnat kusanarsarnissamik peqquteqanngitsumik iviangiminnik millisitsillutik pilatsissimasut, iviangiusatut atorallagassaannik ataatsimik kiisalu iviangequtinik marlunnik akeqanngitsunik suliaritereernerup kinguninngua neqeroorfigineqassapput.

*Imm. 2.* Sungiussereernerup kingorna iviangiusamik ataatsimik iviangequtinillu marlunnik akeqanngitsunik neqerooruteqartoqassaaq, pisariaqartitsineq tunngavigalugu taarserneqartartussanik, taamaattorli amerlanerpaamik ukiumut iviangiusamik ataatsimik iviangequtinillu marlunnik akeqanngitsumik tunniussisoqarsinnaavoq.

#### *Nujaasat*

**§ 12.** Nappaat katsorsartinnerluunniit nujaasanik pisariaqartitsilernermik kinguneqarsimappat, nakorsaq akeqanngitsumik nujaasartaarnissamut innersuussisinnaavoq. Nujaasat pisariaqartitsineq naapertorlugu taarserneqarsinnaapput, taamaattorli ukiumut amerlanerpaamik nujaasat ataatsit akeqanngitsumik tunniunneqarsinnaallutik.

*Imm. 2.* Nujaasat nujaviunngitsunik sanaat annoraassiassamut ikkussukkat tunniunneqarsinnaapput, allanik nakorsaq innersuussisimangippat.

*Imm. 3.* Nujaasat imm. 2-mi taaneqartunit allaanerusut peqqinnissaqarfiup tunniutissallugit neqeroorutigisinnaavai, akit nikingassutaat akilersillugu.

#### *Tusartaatit*

**§ 13.** Nakorsamit innersuussutigineqartumik tusartaammik nalinginnaasumik siullermeertumik pissarsineq akeqanngilaq.

*Imm. 2.* Nakorsamit innersuussutigineqartut tusartaatit nalinginnaanngitsut akeqanngillat, tusartaat nalinginnaasoq tusartaatitaartussap tusaaniarneranut naammaginnartumik iluaqutaasinnaanngippat.

*Imm. 3.* Tusartaatinik imm. 1-imi aamma 2-mi pineqartunik iluarsaassineq taarsiinerluunniit akeqanngillat, atornissaannut ajoqutaasoq nalinginnaasumik atuinerup kingunerisimappagu.

*Imm. 4.* Tusartaatit imm. 2-mi oqaaseqatigiinni siullerni allassimasunit allaanerusut tunniukkumallugit peqqinnissaqarfiup neqeroorutigisinnaavaa, akit nikingassutaat akilersillugu.

#### *Isarussat aamma kontaktlinset*

**§ 14.** Peqqinnissaqarfik isarussanut, kontaktlinsenut imaluunniit taamaaqataannut isiginermut iluaqusersuutinit taamaallaat tapiissuteqarsinnaavoq, taakku:

1) Pilattaanerup kingunerisaanik nakorsamit innersuussutigineqarsimappata.

2) Suliarinninnikkut paasisaqarnerup kingorna nakorsamit innersuussutigineqarsimappata, imatut paasillugu:

a) Isip ameraasaani, isip ameraasaani qaamasumi imaluunniit uisorersaataani nappaateqartoqarpat.

b) Isip tappiutaani nappaateqartoqarpat.

c) Nakunganermut isi assiaquserlugu katsorsaaneruppat aamma isigisinnaassusermik sungiusaaqqinneruppat.

d) Allatigut isikkut nappaateqartoqarpat, nappaatinut normulersuutigalugit naqinnerni a-c-mi taaneqartunut nallersuunneqarsinnaasunik.

*Imm. 2.* Isarussanut, kontaktlinsenut imaluunniit taamaaqataannut isiginermut iluaqusersuutinit aamma tapiissuteqartoqartarpoq, - 7 ataallugu imaluunniit + 7 sinnerlugu sakkortussusilimmik isigisinnaassuseqaraanni. Isigisinnaassutsip sakkortussusianik naatsorsuinermi isarussanut nalinginnaasumik sakkortussusilinnut aamma isigisap ajoquteqarneranik iluarsiiinnermut kisitsisinik katiterineq atorineqartarpoq.

**§ 15.** Isaruartaarnermi, § 14 takuuk, peqqinnissaqarfik isarussat isitaannut taamaallaat tapiissuteqassaaq. Peqqissutisimut Pisorta qarfiup aalajangigaanik isarussat isitaasa nalinginnaasumik pitsaassusillit akiattut tapiissutit annertutigipput.

*Imm. 2.* Siullermeertumik pissarsinermi taamaallaat tapiissuteqartoqartarpoq, kiisalu tamatuma kingornatigut isigisap sakkortussusiata minnerpaamik 0,5-imik allanngornera paasineqaraangat.

*Imm. 3.* Aalajangersimasumik sakkortussusilinnut isarussanut ataatsinut taamaallaat tapiissuteqartoqarsinnaavoq. Taamaattoq aalajangersimasumik sakkortussusilinnut isarussanut arlariinnut tapiissuteqartoqarsinnaavoq nakorsap innersuussineratigut, tamanna suliarinninnermi pissutsit immikkut ittut pisariaqartippassuk.

**§ 16.** Kontaktlinsetaarnermi tapiissuteqartoqassaaq § 15, imm. 2 naapertorlugu aalajangersimasumik tapiissuteqarnertut, kontaktlinset qeratasuut nalinginnaasumik pitsaassusillit akiannut naapertuuttumik Peqqissutisimut Pisorta qarfiup aalajangigaa naapertorlugu.

#### *Iluaqusersuutiniq utaqqiisaagallartumik attartortitsineq*

**§ 17.** Suliarinninnermut atasumik imaluunniit kapitalimi matumani malittarisassat naapertorlugit peqqinnissaqarfik utaqqiisaagallartumik atortorissarutiniq atukkiissappat Peqqissutisimut Pisorta qarfiup akigititassatut aalajangersagai naapertorlugit qularnaveeqqutiniq akileeqqusisoqassaaq. Aningaasat qularnaveeqqutigineqartut erniaqartinneqartussaangillat.

### **Kapitali 4**

#### *Nakorsaatit*

**§ 18.** Pisortat napparsimmaviutaanni napparsimasumut uninngatinneqartumut nakorsaatit tunniunneqartut akeqanngillat.

**§ 19.** Napparsimasut pisortat napparsimmaviutaanni uninngatinneqanngitsut nakorsaatiniq akeqanngitsumik taamaallaat tunineqarsinnaapput nakorsamit, kigutit nakorsaannit peqqinnissaqarfimmiluunniit sulisumit akuersissuteqarfigineqarsimasumit allamit nappaatip

tassanngaannartup ataavartulluunniit katsorsarneqarnissaanut allaganngorlugu innersuussisimaneq tunngavigalugu.

*Imm. 2.* Nakorsaatinik sivisunerpaamik qaammatini pingasuni atorineqartussanik tunniussisoqartarsinnaavoq.

**§ 20.** Nakorsaatit nioqqutigineqartut pisut § 19-imi taaneqartut avataatigut taamaallaat akilersillugit tunniunneqarsinnaapput. Nakorsaatit nioqqutigineqartut niuertarfinni akissaannik aalajangersaasoqarsimappat taanna aki naapertorlugu § 2, imm. 4-milu allaffissornermut tapiliussassatut aalajangersarneqarsimasoq ilanngullugu tunineqassapput.

*Imm. 2.* Utoqqalinersiutillit siusinaartumillu pensionisiallit nakorsaatinut nioqqutigineqartunut akiliisassanngillat, nakorsaammik pineqartumik pisariaqartitsineq nakorsap innersuussineratigut uppersarsarneqarsinnaappat.

#### *Akiuussutissalersuinerit*

**§ 21.** Akiuussutissalersuinerit peqqinnissaqarfiup meeqqanik akiuussutissalersuineranut ilaasut akeqanngillat.

*Imm. 2.* Akiuussutissalersuinerit imm. 1-imi taaneqanngitsut akiuussutissartaasa akilernerisigut akiuussutissaliisoqarsinnaavoq, taamaattorli imm. 3 takuuk.

*Imm. 3.* Utoqqalinersiutillit, siusinaartumik pensionisiallit inuillu qanimanartoqartitsisinnaasut nualluummut akiuussutissamut akiliisussaannngillat, nakorsap akiuussutissalersuinessaq pisariaqartippagu.

#### *Nakorsaataasiviit*

**§ 22.** Umiarsuarnik, silaannakkut angallatinik, pisortat suliffeqarfiutaannik, ilisimasassarsiornernut imaluunniit najugaqarfinni avinngarusimasuni nakorsaatinik pilersuineriut atorillugu peqqinnissaqarfik nakorsaatinik allanillu atorussanik tuniniaasassaaq.

*Imm. 2.* Nakorsaataasivinnik allanillu nakorsaatinut toqqorsivinnik imm. 1-imi pineqartunik nakkutilliinermut immeeqqittarnermullu akigititassanik Peqqissutsimut Pisortaarfik aalajangersaasuvoq.

### **Kapitali 5**

#### *Peqqissutsimik inunnillu misissuinerit, laboratoriamit sullissinerit il.il.*

**§ 23.** Pisortatut oqartussaasut namminersortullu suliffeqarfiutaasa atugassaannik pisortat peqqinnissaqarfianni taannaluunniit sinnerlugu peqqissutsimik misissuineriut, inunnik misissuineriut, nappaatinik paasiniaalluni laboratoriamit kiffartuussineriut sulianullu assigisaannut peqqinnissaqarfik akileeqqusisinnaavoq. Taakku suliarineriut atasumik sulisut angalaneriut najugaqarnerinullu aningaasartuutit peqqinnissaqarfiup susassarinnngilai, tamanna inatsisini allani allassinanngippat.

*Imm. 2.* Eqqartuussivinni atugassanik nakorsat inunnik misissuinerannut peqqinnissaqarfik aammattaaq akileeqqusisinnaavoq.

*Imm. 3.* Peqqinnissaqarfik imermik imerneqartartumik imermillu inuussutissanik nioqqutissiornermi atorineqartartumik laboratoriami misissuineriut aammattaaq akileeqqusisinnaavoq.

*Imm. 4.* Imm. 1-3 naapertorlugit sullissineriut Peqqissutsimut Pisortaarfik akigititassanik aalajangersaasuvoq. Toqnermut nalinginnaasumik uppersarsaasiinermut akiliutissamik akileeqqusisoqarneq ajorpoq.

§ 24. Inuunermut sillimmasiinnermut, biilersinnaanermut allagartartaarnermut assigisaannullu atugassanik peqqissutsimik misissuinnermut peqqinnissaqarfik neqerooruteqarpat, tamanna pillugu Peqqissutsimut Pisortaqarfik akigititassanik aalajangersaassaaq.

## Kapitali 6

### *Journalinit takussutissiat*

§ 25. Napparsimasut inatsisitigut inissisimanerat pillugu Inatsisartut peqqussutaanni malittarisassat naapertorlugit napparsimasut journaliinit inuit takunnissinnaatitaasut journalit assilinqarnerannut akiliummik Peqqissutsimut Pisortaqarfiup aalajangersagaanik akiliuteqassapput.

## Kapitali 7

### *Sullissinnermik tunisisarneq*

§ 26. Peqqissutsimut Pisortaqarfimmit akigititassatut aalajangersarneqarsimasut naapertorlugit akiliisitsinikkut peqqinnissaqarfik nerisassanik makkununga tunniussisinnaavoq:

- 1) Peqqinnissaqarfimmi sulisunut, suliffiup nalaani nerisaqarnissaq siunertarlugu.
- 2) Peqqinnissaqarfimmit ingerlanneqartuni pikkorissartitsinnermi ilinniartitsisunut peqataasunullu.
- 3) Inunnut Namminersornerullutik Oqartussat akiligaannik angalasunut, peqqinnissaqarfimmi akeqanngitsumik nerisaqarnissaminut pisinnaatitaaffeqanngitsunut.
- 4) Ilaqutaasunut peqqinnissaqarfiup akiligarinnigisaanik angalasunut.

§ 27. Nammineq suliffeqarfiutini akiliisitsilluni errorsissussinissamut peqqinnissaqarfik neqerooruteqarsinnaavoq Peqqissutsimut Pisortaqarfiup akigititassatut aalajangersagaanik akiliisitsilluni. *Imm. 2.* Imm. 1 naapertorlugu akiliuteqartitsilluni errorsissussineq illoqarfinni nunaqarfinnilu assigisaanik inuussutissarsiutitut ingerlatsisoqarfiusuni pisinnaangilaq, Namminersornerullutik Oqartussat, kommunit Naalagaaffullu ataanni pisortat suliffeqarfiutaannut tunisinerunngippat.

### *Peqqinnissaqarfiup biiliinik ingerlassineq*

§ 28. Peqqinnissaqarfik biiliinik aquttullinnik attartortitsinikkut ingerlassinissamik neqerooruteqarsinnaavoq Peqqissutsimut Pisortaqarfiup akigititassatut aalajangersagai naapertorlugit akiliuteqartitsilluni, tamanna napparsimmaviup ingerlanneqarneranut akornutaanngippat.

*Imm. 2.* Illoqarfinni nunaqarfinnilu taamatut inuussutissarsiutitut ingerlatsisoqarfiusuni imm. 1 naapertorlugu akiliuteqartitsilluni ingerlassisoqassanngilaq, Namminersornerullutik Oqartussat ataanni pisortat suliffeqarfiutaannut tunisinerunngippat.

§ 29. Biilit taamatut atussallugit naleqquttut atorlugit toqusut timaannik utoqqaat illuiniit, plejehjemminiit assigisaanniillu ingerlassinissamut peqqinnissaqarfik neqerooruteqarsinnaavoq Peqqissutsimut Pisortaqarfiup akigititassatut aalajangersagai naapertorlugit akiliisitsilluni, tamanna napparsimmaviup ingerlanneqarneranut akornutaanngippat.

*Imm. 2.* Imm. 1 naapertorlugu toqusut timaannik ingerlassineq illoqarfinni nunaqarfinnilu assigisaanik inuussutissarsiutitut ingerlatsisoqarfiusuni pisinnaangilaq.

## Kapitali 8

### *Atuutilerfia*

§ 30. Nalunaarut atuutilerpoq ulloq 15. marts 2006.

*Imm. 2.* Nalunaarutip atuutilernerata peqatigisaanik atuukkunnaarsinneqarput:

- 1) Peqqinnissaqarfiup sullissinerinut akiliuteqartarneq pillugu Namminersornerullutik Oqartussat nalunaarutaat nr. 7, 30. marts 1993-imeersoq.
- 2) Isarussanut kontaktlinsinullu tapiissuteqartarneq pillugu Peqqinnissamut Avatangiisinullu Pisortaqarfiup kaajallaasitaa nr. 5, 24. juni 1993-imeersoq.
- 3) Atortunut iluaqusersuutitut, kapitinnermut aammalu uppersaatinut nakorsiarnernilu nakorsat allattugaasa nuutsinnerinut akiliuteqartitsisarneq pillugu Peqqinnissamut Avatangiisinullu Pisortaqarfiup kaajallaasitaa nr. 6, 12. oktober 1993-imeersoq.
- 4) Nakorsaatit akii pillugit Peqqinnissamut Ilisimatusarnermullu Pisortaqarfiup kaajallaasitaa nr. 9, 10. september 1997-imeersoq.
- 5) Peqqinnissaqarfiup sulliviutaasa nerisaqartitsinerinut akigitinneqartut pillugit Peqqinnissamut Pisortaqarfiup kaajallaasitaa nr. 12, 25. april 2001-imeersoq.
- 6) Napparsimmaviit sapertunut immikkoortortaanut sapertunut ikiutit isumaginninnikkullu iliuutsit pillugit nakorsaanernut tamanut Peqqinnissamut Aqutsisoqarfiup kaajallaasitaa nr. 115, 1. februar 1979-imeersoq.
- 7) Kalaallit Nunaanni inunnut aalajangersimasunut napparsimasunik ikiorsiisarneq pillugu Kalaallit Nunaanni Nakorsaanerup kaajallaasitaa nr. 136, 21. april 1983-imeersoq.
- 8) Kalaallit Nunaanni napparsimmavimmi uninnganermut kiisalu napparsimmavimmut uninnani nakorsartinneq, misissortinneq nakorsatinillu tunniussinermi akiliutit pillugit Kalaallit Nunaanni Nakorsaanerup kaajallaasitaa nr. 23, 28. februar 1986-imeersoq.
- 9) Rigshospitalimut suliaritinnissamut innersuunneqarnermi angalanermi aningaasartuutit akilerneqarnissaat pillugu Kalaallit Nunaanni Peqqinnissamut Ingerlatsiviup kaajallaasitaa nr. 27, 24. marts 1988-imeersoq.
- 10) Peqqinnissaqarfiup errorsisarfiini errorsinnermut manissaanermullu akigititat pillugit Kalaallit Nunaanni Peqqinnissamut Ingerlatsiviup kaajallaasitaa nr. 43, 31. januar 1990-imeersoq.
- 11) Nunanut allanut angalasunut kapitinnerit pillugit akiliuteqartarneq pillugu Kalaallit Nunaanni Peqqinnissamut Ingerlatsiviup kaajallaasitaa nr. 45, 27. november 1990-imeersoq.
- 12) Kalaallit Nunaanni sulinermi ajoqusernermut sillimmasiisarnermut tunngatillugu nakorsamit nalunaarutit nakorsanit suliarineqartarneri pillugit Kalaallit Nunaanni Nakorsaanerup kaajallaasitaa nr. 25, 27. juli 1990-imeersoq.

*Namminersornerullutik Oqartussat, ulloq 15. februar 2006*

Asii Chemnitz Narup

/

Søren Rendal



**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut